

四明叢書

張宗祥



白嶽游稿

四明張氏約園開雕

序

黃山白嶽並峙黟婺明嘉靖壬辰世宗錫白嶽名曰齊
雲山然高不及武當十之二表不及雁蕩十之三而怪
石奇峯刻畫肖形甲於宇內游者始入率以白嶽高至
桃源則白嶽已在其下至車硤則桃源又下至齊雲則
車硤益下顧余一登黃山而未訪白嶽黃山之勝皆其
天然者也有三十六峯三十六源二十四溪十二洞八
大巖昔人有詩曰人間有石皆奴僕天下無山可弟兄
誠非虛語今讀沈嘉則白嶽游稿蓋嘉靖癸亥與吳原

柏守淮唱和詩也且冠以記其詠歌所及者若太素宮
飛雨樓棚梅庵石橋院紫霄樓五老亭望仙亭皆人造
者也而余欲訪黃山之古迹則一無存者蓋剗削消磨
於兵戈也久矣樓臺亭閣有時而盡山水溪壑歷久長
留況人生數十春秋境有所牽逝焉不覺雖有佳山水
其許我沁心滌魄者乃偶然耳多難登臨古今致慨人
無徒觀其變而覩其不變焉則游者之理慳矣抑程篁
墩游齊雲記有云淳祐辛酉大雷雨裂石壞屋而玄武
神像巋然獨存然則石可裂屋可壞而惟此山靈所鍾

有不可泯滅者天之高地之厚雖大雷雨其又何害時
豪於詩者吳門王伯穀松陵王承父與嘉則而三嘉則
有四明山記黃梨洲採錄於四明山志豐對樓詩選四
千餘首有萬曆丙申刻本今更刊斯稿因誌感云民國
二十六年十一月後學張壽鏞序

臣等謹將

約園刊本

白嶽遊稿敘

辛酉冬予遊武林館于瑞后山麓四明沈嘉則來訪識面契合卽與定交往來湖山懽逾夙締每談必曰君家白岳黃山余夢寐久矣今得君有地主矣余將畢此願也臨別各賦詩一章予有白嶽黃山問路程之句癸亥夏嘉則以問安胡司馬來新都過予王潭把臂大笑曰白岳黃山之願今可畢也以訪吳原柏過南溪原柏聞嘉則有此願卽從往白岳旬日淹留盡窮峯壑巖洞之勝而歸乃持書招予過南溪嘉則出白岳所賦詩評之

原柏所和半焉予賞其詩曰此皆唐之遺音邪詩固美
矣背予舊約君謂之何哉嘉則曰予罪矣予罪矣予將
勒此詩持歸東海之上誇予社中諸子君其序之予曰
君社中諸子若張孺穀君從子箕仲予友也貪珠者聞
珠而欣于沈浦嗜獵而豔于入林予知二子白岳之興
勃然不必路程問於予蓋以君此詩爲前旌矣嘉靖癸
亥年九月望日十岳山人王寅撰

白嶽遊稿

記

嘉靖癸亥秋八月廿一日丁卯余與友人張平叔宿吳原柏流雲閣將遊白嶽先是齋沐戒曉原柏與其從父汝章治輿馬以行侍者三一爲海螺使侍原柏二爲余所攜迺行二十餘里至萬安街雖多山徑皆平衍疏林清池在在有之道有高松一樹在簷路有樺柳一樹在後村皆蔭可數畝而樺柳尤大大六圍停午飯萬安橋酒家越西休邑出西門石橋長可數百尋橫截碧谿

之上原柏爲余西南指落石期歸途登之余以肩輿故
先至藍渡三君策蹇後至申刻抵白嶽山麓三君浴于
谿易衣登山余與原柏杖策上盤迴數十折亭臺下上
凡十有七處題額多不雅茲不載至淨樂宮下視桃花
澗煙村雲塢竹樹參差雞犬聲聞天上眞仙人界也昔
人謂武陵原信矣時日已西沒紫黛異狀萬巘獻奇夾
道皆蒼松綠篁微風迴壑瑟瑟作小濤聲若來自寒江
激浦使人耳目接應不暇俄轉一石壁倚天橫障色微
絳蒼碧相錯石級上下路曲曲皆闌以石名爲步虛循

壁轉而上忽石戶鉤然若門深廣盈丈前樹石楠高十丈大四圍傳爲古神人所植理或然也是爲天門山如象門處當象之鼻故置一石坊塞下今去之足稱快矣壁鐫四字曰復還天巧其知言哉西北折而南爲觀音巖爲雨君洞爲羅漢洞爲文昌巖爲黑虎巖下有鸚鵡石雨君洞下有池爲碧蓮上有瀑布爲水簾池再下爲雲龍潭景幽奇石色皆蒼赭壁立而觀音雨君諸洞皆有祠成屋惜爲俗士鐫題破浣山色又西折而北爲天梯下爲眞眞石室上爲三元宮紆迴循歷皆道竅棲止

而北上爲咆哮石石上爲榔梅菴菴主爲汪竹泉汪之徒爲吳蓮塘吳之徒爲陳松谷吳乃汝章族子是夜遂宿吳紫霄樓明日晨起盥櫛入太素宮肅拜玄帝像殿宇宏麗瓦皆碧當殿一峯屹立曰香爐峯上立一金亭朝旭初射宿露未稀金碧晃炫頗奪人目而殿枕五屏峯左右爲鐘鼓峯鼓峯爲碧霄峯峯上一亭望之如在太虛中也謁罷西行數十武爲退思巖入巖西抵爲捨身巖石上有偃月池復歸飯榔梅吳乃遣徒黃生堯儒侍遊童子桂兒挈榼予故所侍三童子持茗果研筆刀

鎚之屬隨之予四人各杖策西行過隱雲峯浮雲岑華
林塢至仙鵲橋下觀太守所書萬峯晴雪字指馴鹿洞
樓霞洞而下視則仙藥池池下爲沈香洞去路路眇微
不暇尋歷劒峯出風虎關北折有瀑布爲飛雨泉厓壁
上鐫飛雨字字下倚岫作樓三楹樓名如字余與原柏
登此看天都峯各作詩二首懷王仲房而黃生令作午
餉于此樓下爲太乙池連峯相接爲紫霄厓壁立數百
仞若鐵障橫空秋霞飛抹而厓下片石平坐可萬人故
云萬人巖俗爲萬人緣恐非厓下有池池中有穹碑碑

文出唐寅手予四人題名紀歲月于下在碑左平叔書
汝章鏤之紫霄厓右列三殿皆倚岫爲屋中爲玉虛宮
厓左爲昇仙峯爲展旗峯下爲駱駝峯而余與原柏西
出雲龍關觀三姑五老五鳳獅子諸峯而紫雲關界在
五老獨聳峯之閒飛舟中隱關外天柱峯離立獨映遙
山遠翠欲撲人衣而清畫雲消天碧如洗片月在五老
峯頭予二八杖策觀之口占小詩長吟徐步至紫雲關
臨平叔已高枕片石臥關上矣倦甚復歸榔梅少憩行
酒三五畝日稍晡復東南行上三清殿殿瓦皆碧下天

梯再觀雨君諸洞時秋旱逾月水簾絕流坐移時始一
二碧蓮池上聽之冷然因借僧蒲團臥石上汝章諸君
已長嘯于天門下原柏與黃生奔俄而松谷朱道士攜
酒果至相忻然一飲之罷歸訪金長白長白爲本宮提
點卽松谷師復宿紫霄樓因長白諸君請結字數紙明
日吳復使黃生治尊疊由紫雲關西下石梯數百級縈
迴數十折至天柱峯麓東行數里皆清谿瑤草絕無人
跡至渠口復南折而西蓋出齊雲背下有密多巖作餉
酒家原柏解杖頭錢市酒脯以行過雙谿村盡蕭然一

野廬問主人爲朱山人云屋後一池花竹蘿蔓蒼然可
靜對因各解衣坐良久與語類有道者醫卜賣漿殆隱
士之流歟西上夾路皆平山小谿而谿北山多天柱後
諸峯一山高峙石平列如城色蒼赭一如修廊數百間
蒼碧丹紺錯列雲中俱不得一登爲恨谿之南狀若九
鼓爲九鼓峯去石橋東南三里而西北盤旋至谷口時
日欲西下四五家皆農樵雜居谿谷閒度一小橋望見
萬峯中一壁赭立乃滄陽巖正石橋處也平叔汝章已
先至鳴鐘鼓矣余與原柏渡石澗西上披草萊徑田而